



柳待制文集卷之十一

墓誌銘

教諭泰和歐陽溥編輯
訓導江浦郁珎 校正

義方陳母丁孺人墓碣銘

并序

建安陳湜衰經踵門以謁自通於予予出與成禮退
詢其故湜再拜起涕泗言湜喪母踰年哀未即死圖
終窆窆之事今既卜得日湜之同門友蔣易實爲湜
謀所以不死其親者曰易次而母諸行往來柳先生
銘先生樂稱人之善其將有以假寵於而母矣湜特
是而來惟先生之畀矜之也嗟乎予文詎能使而母
昭昭於地下雖然起孝之志予其忍重違之按易狀
孺人丁氏諱臨字淑道世籍建陽之嘉禾上里父諱
澄號柝里長者孺人幼慧讀論語孝經孟子識其大

意古人文字經目輒成誦處室時嘗孝和詩伯父縣丞公戒曰婦人職知婦道詩非所宜習蓋終身服之不敢言文年二十四歸中里陳君騰實君故仕宦家子又早孤時經喪亂橫賦重斂日暴月虐君素濡弱常破產應之家遂以削孺人入門撿括內計盡得孔隙曰此豈猶不可爲乎稍出其智補空罅冗芟除薈翳未久而生道裕如閱十三年君即世孺人益自力於儉勤躬操簿書手執筭籌雖一錢一孔之出入必使節葉可尋而根株可以覆按廣田疇新室廬諸凡潤飾先業有男子志慮所不能及者孺人子男四女一喪父時長纜十二而季猶未晬稍長入小學闢塾曰義方堂延名師就講肄暇日則應舉小學書立教

大指示警厲於諸子而怡怡奉親長不敢生驕易之句又當常語及之他日子知博習女知順從人以爲義方之教然也孺人質敏而惡華簪珥服御不競妍好晨興坐堂理家政問絲賦問米鹽言人人殊而出語應之各中肯綮或時過午食不下嗔僮隸意其倦且休矣而區畫靡密滋無惰容大抵治家整肅內外斬斬踐其庭者見其左跽規矩右循繩尺而和氣充勃溢慝自無因而入也陳氏族盛宗中興來嘗有顯者今浸遠浸湮里中尚五十餘室孺人禮其尊老而慈其卑幼往來問遺無愆節戚疎少長無間言比歲丙申丙午荐饑里民艱食孺人既爲粥以活餓者又下其粟估稍賑卹其未沾於危者病不能謁醫亦隨

證注善藥予之曰毋庸使它人知其施實德於鄉鄰固如此孺人婺居三十年貞節潔行足以表見於世里耆聚謀方欲列上其事請加旌復書適具元統二年正月朔晨起炷香誦道釋經已忽覺體中小不佳就寢而疾作禱醫弗效子湜竭誠露禱割股和糜以進亦輒弗效更十日卒得年六十五子曰泐曰澧曰涓曰湜涓早卒安和適崇安詹天增和先一年亦卒孫男五元燾佛僧元亨元泰元顯孫女六初君之喪孺人爲卜歲室甫發而涓夭徵之堪輿家言咸謂不利及三改卜兆域始宜孺人曰亡者得妥其靈則生者宜有蔭藉費雖巨吾敢屑較之哉凡甓窆而封陳牲而虞肅賓製服飭具每益謹已又曰陰陽拘忌爲

人子弟亦所宜知命泐因傳其書爲其學廌於是泐所從授書者章貢劉君某復來爲孺人謀相墓得某山之原維食卜用某月某日鑿窆某月某日掩坎卒之明年也易之狀曰易狀孺人之行得於宗老之賢者皆不謀同辭吁信然矣曩易從杜先生武夷槩論節婦之被挂門者先生曰使世之公論不屈而有賢守令者出則若陳氏母之操行風節自當表而上之不然挂復之令何爲者哉孺人已矣亦徒以重失君子感今思古之情子是以序而系之俾湜持歸請先生書而表諸墓上倘萬一適人之來馬則孺人之成教遺範猶足以衣被來世而陳氏之不遂泯泯者庶其有在於是銘曰

遭家孔艱亟返之安其智間間生日以遂養日以備
殞於中世有子有孫宜于其家相維斯丘不亢不污
高四尺者孺人墓耶

澹居處士馬君墓碣銘

馬氏望扶風而再徙于南者惟新定新亭之族尤衍
以碩禮部尚書公諱大同以政學顯宋淳熙間與紫
陽文公實交相引重詩書之澤洽于孫曾雖所資所
藉有淺有深大抵郁如也尚書伯凡諱大方六世得
澹居處士處士諱之純字希文卒以至順元年閏七
月乙巳春秋七十又六葬以明年二月某甲子兆在
孝行鄉之塋雲原前葬嗣子恭命揆子瑩爲書一通
著其行業即請予所善東陽柳貫銘而塚諸緋纒之

碑貫幸嘗執筆隸奉常職在誅行而考辭諷事又知
處士爲厚德長者可銘不誣迺系而銘之處士夷靖
簡亮人也讀書務明體要不爲章句繳繞視世俗豪
攫智籠之術如疾狗偷屏羨黜浮自致饒裕然聞里
黨間有一義可爲奮勇赴之不誅不撓至兀中有司
嘗征商於野民甚病焉處士持牒懇行中書以爲與
民爭利非盛世事卒覆按除之大德丁未歲大侵處
士傾廩以饋餓者掩背以從禮制或欲上其名應出
粟補官之令則厚謝曰吾知盡吾力敢徼賞哉處士
仲兄早卒鞠其子如巳子子尋卒鞠其孫孫又卒鞠
其曾孫葬祭以禮婚娶以時植其門戶如初處士聚
書至數千卷畜古今法書名畫亦數百軸花時菊景

繫觴陳俎從賓客歡賞引滿徑醉蓋歲歲常然將死
語子若孫曰吾無愧於人人亦無憾於吾即就木安
焉耳訃聞閭居野處之夫咸曰善人已矣吾將何賴
處士之配董氏亦有賢行卒先一年今舉以祔其域
處士無子以伯兄之子後命族子請銘者也孫男二
禮禔孫女一尚芳處士之曾大父諱崇大父諱鎔父
諱熙孫皆隱德弗耀曰澹居云者處士所自命也處
士嘗患里中子弟爲聲利塗塞耳目思一洗濯新之
方將割田闢塾致明師宣昭經誼以大變其俗而竟
齋志入地嗚呼佛哉處士之有蘊不試者如是是足
以表世燾後矣可無銘乎銘曰
士非盜名禮可求野不有耆碩孰起淪謝君子尸之

適觀大雅今其亡矣有不亡者紹聞德言以祭于社
相維斯丘孫曾受嘏

故平陽州判官陳君墓誌銘

釣臺書院山長陳士貞過貫泣拜言曰我先人早自
奮於仕道淹回州縣餘廿年方累聖繼明惠綏臣下
堆思進秩便蕃優渥而疾病侵凌薄于既耄卒以不
偶死今墓草幾宿而隧間之石未有刻辭夫子蓋嘗
辱交焉倘幸假茲鄉曲之誼畀之一言則先人有知
將不悼其埋鬱於土中也貫既拜而受言則退考鄉
貢進士吳萊所爲事述掇其可書者序而銘之序曰
君諱遠大字宏父姓陳氏陳氏本出彭城中世南徙
占籍於婺之浦江鄉曰德政自君始又徙縣東北之

興賢鄉村曰某村君少從鄉先生學治經爲尚書大義下筆無留思然好倜儻之畫策慨然欲有所爲於時會邑里初內附山谷獷強猶蜂蟻聚負固弄兵間則出相寇攘君曰吾其有以自效即釋儒服去從軍首建購捕之方次陳綬靖之略凶渠既得餘孽悉平幕府上其功而君亦隨計至京師得試將仕郎辰州路施容州判官未上而鄰工有警郡復檄君至麾下資其智勇多所俘獲大帥府材君之爲而惜其棄之遐陬復刻上之意將引以自近久廼改全州路清湘縣丞在官八年稍進從仕郎贛州路信豐縣尹轉承事郎温州路平陽州判官於是君累官嶺海間風淫霧毒之所襲腰脚痺弱不良于行曰吾老矣不復有

四方之志矣因自免歸題其宴坐之室曰達觀幸賓客至則命豆觴諧笑從容連日夕猶儒生故態也踰跼勃萃居十二年泰定三年六月廿四日卒得年十九清湘介湖北窮徼谿壑峯峒撩錯居其壤山有毒蛇儲之爲蠱以中人立死而獄多莫辨君曰戒人以售其妖此宜犬豕弗食可少貸之乎悉論寘于法撤淫祠魔菴又數十區取其材瓦葺新學官曰此教基也庶幾使民知所以教時方有事交趾全當空道餽餉所出他官屬或畏難遁去徵發調送郡獨倚君以辨贛有廢縣龍南居獠中而以其地隸信豐南安萬戶府蓋僑處其縣官命分卒爲六屯使耕龍南曠土自食其力以備捍禦久之招納亡命橐籥姦私民甚

患之而未有以想也君列上其事請復置縣從其軍
蓋按覆數四而卒無以易君之議焉君之政大抵皆
可紀而狀君之行者徒以士貞之能言者筆之書則
夫士貞言焉而不及者尚多有之雖以子之知君而
不敢溢於辭懼非傳信之義也君之先配黃氏先君
卒今配林氏治家得毋道甚子男二長士元梧州路
儒學正早卒次則士貞女二壻曰倪鈿戴桴孫男三
佑僖倫孫女三未行曰夔曰文煥曰德潤君之曾大
父大父父也大父嘗以登仕郎自試入官而未及仕
君之葬其地巖塢距家一里君所自卜天曆元年十
一月朔葬之日也自君病癯卧家以及于死迄今未
廿年而鄉鄰之後生脫輦已無有能言其歷官行業

之詳者矣使更數年則君之與存者幾何哉宜士
貞求文表著之汲汲焉而不敢後也然則古之以
功業自見而恃以傳者亦若是而已寧獨君哉銘
曰
智名勇功所謂財隨而有獲繫乎時哉昔君用拙
直奮無回乘于屯仕道以開轉丞試令績用恢恢
駕車橫陽有沃西來孰挽而行孰軋而摧歸承燕休
終于考台巖塢之丘封樹莓莓相爾嗣人視崇思隤
凡物之生有覆有培人胡不然自收其枚吾銘尔貽
併泄尔哀

盧氏母碣銘

盧氏母杭州城東人徐姓諱妙安歸里中盧翁翁業

坐肆販繒毋常佐之操竒贏聯什一稍稍致饒俗而
儉順之化行於其家穆如也生男女一女適徐永亨
男德恒治岐伯倉公鬼吏區言爲疾醫里人誼門求
察脉無論富貧貴賤率與善藥士大夫稱之初德恒
兒時行戲市中得道棄佩刀携白母母變貌切責曰
是豈無主物哉曷不待其還求審而歸之尔未成人
已自利如是吾安望尔怒經日不解德恒自少即知
分別義利毋教實然也泰定四年母季七十七疾既
感語德恒曰汝能盡子道已惟當盡人道則我死其
無憾人嗔曰語諸孫曰勤讀書勤讀書語未終而逝
二月十日也德恒買美楨爲觀具髹衣爲斂治喪制
服壹遵禮經踐雨風沙濤江行求瑩城岡昇間兢兢

惴恐若或失之如是三年得錢塘縣定山范村之桐
樹塢相墓者曰宜卜兆者曰吉迺以至順二年十二
月庚申奉匱即窆之明年將植碣表墓請予銘而
刺之予惟抗故俗家有喪用浮屠老氏之法建壇場
設齋祠歌嘑作樂越月踰時舉匱畀之炎火拾燼骨
投之深淵燕娛賓費數鉅萬以此相高湯曰吾不
儉其親矣萬有一能營隙地湖山左右琢雕刻鏤爲
墓治隧又不過夸盛強飾觀遊往往艸未再宿而已
夷爲平陸其悖禮違義日趨於薄於愛親乎何有今
德恒卓然拔流俗推其自盡之心成是曰山之禮池
不愛寶龜不祕智是開佳城以封以樹則夫致吾之
孝以盡人之道固足以蔭籍其子若孫矣翁諱華卒

先十二年年六十八其葬徐村距桐樹塢數里而近
孫男四浩澄杏子婆留孫女一德恒字仲庸治生厚
交不爲市道庶幾柳子厚所稱長安藥市宋清者予
每資其夜齋以爲哀莫之防焉迺不辭而與之銘銘
曰

圜一道人墓碣銘并序

圜一道人爲老佛之學得其玄微而不滯於名相所
謂遊方之外者也道人頽身廣頽踈眉秀顙常所戴
履艸冠繩屨而已然其風神曠朗人望之如古仙劍
客性嗜遊名山水在數百里間一筇徑造興盡即還

居鄉不爲崖異而視世人用計巧取之術疾之甚於
狗偷道人世居建之浦城諸祖以上皆有仕籍于宋
族故大也既冠而遭兵燹間閔維析獨幸與其母姚
出萬死一生中早暮調適言甘節時燠寒曰吾有母
在它無恤焉蓋沒身孝養孫篤中徙縣東鄉泰寧里
耕稼樵漁外託興吟嘯言皆根理天曆二年其歲已
巳春秋七十又一以疾卒家九月十二日也明年至
順元年正月某日葬大嶺下瀆原合于其配鄧氏之
窆初道人無子已而有子其養子曰鐘嫡子曰鉉女
二皆嫁里中人孫男四曾孫男二道人諱玉成姓李
氏自號圜一翁又別號翠陽子祖諱源父諱樸皆業
儒道人葬後一年其方外友虛一先生趙君嗣琪自

京師來錢塘爲予言道人世業行治如此請予銘其
隧予聞莊周言去智與故故無天災無物累無人非
無鬼責若圍一道人庶其似之矣爲銘使刻置隧上
銘曰

以知養恬而遊于玄生不百季樂哉其天

夷門老人杜君行簡墓碣銘并序

至元大德間儒生學士蒐講藝文紹隆製作禮樂之
事蓋彬彬乎太平極盛之觀矣然北汴南杭皆宋故
都黎獻耆長仕仕猶在有能叅摺互計交證所聞則
起絕鑿於敗纒殘楮之中寄至音於清琴雅瑟之外
雖道山藏室奉常禮寺亦將資之以爲飾治之黼黻
若干所識張君君錫杜君行簡則以汴人而皆客杭

最又于時梁集賢貢父高尚書彥敬鮮于都曹伯幾
趙承旨子昂喬饒州仲山鄧侍講善之尤鑒古有清
裁二君每上下其論議而諸公亦交相引重焉延祐
初

朝廷首起君錫爲大樂署丞將次及行簡而君錫死
又數年行簡亦死士論盡然歎詩樂之不復振矣行
簡杜氏諱敬其字行簡世居汴城中祖亨嘗有官勳
父民鑑卒湖南道宣慰副使行簡自幼器識凝邃不
與凡兒徵逐爲嬉戲事稍長學成研窮律本分刺音
節悲憂愉快槩發於琴晴朝月夕人境俱勝觴詠方
適促絃鼓一再行巖溜清而畹蘭潔也學其學者其
抑按吟條皆有指法可傳行簡善書蓄古名人墨迹

歷代金石刻甚富然爲好事者持去亦無係吝性嗜酒客至傾壺倒榼盡醉益歡行簡少嘗以禮部令史從尚書紫公奉使安南還辟廣西帥府掾江淮行省又嘗署人匠提舉司都日江陰權辦官皆以不屑意未移時棄去大冠長裾優游湖山文酒間脫自稱夷門老人得年七十而終泰定元年十二月二十二日也其配李氏里中大姓女婦德毋儀既順而恭卒後八年年若干子男二士元士謙也士元南臺察院書吏士謙浙東廉訪司書吏皆以儒貢孫男五孫女二俱幼士元士謙將自杭舟載其二匱歸卜汴南三家店之瑩以泰定四年某月某日就窆先事以狀請于東陽柳氏曰吾翁早從南北賢大夫士遊竊嘗有考

於藝文之事時非不偶而身不一試不肖孤行能之未著名譽之未立也即葬而無刻辭于隧其何以昭示來稟子幸哀而予之銘焉昔子與安君錫京師有誅今行簡以禮塋銘烏乎辭銘曰

哭

道和德順溢於聲雅南一濫琴孤鳴徽以白玉絃朱繩五音二少濁變清杜氏於琴若天成使和其音薦神明豈不爲世躋隆平江湖遙夜占隕星鑿亡絃絕秋風驚夷山萬里開佳城魂子歸來其永寧

元故太中大夫海道都漕運萬戶周公墓誌

銘并序

海道都漕運萬戶周公以元絃元年十二月七日卒官明年正月十又七日自吳郡買舟載其匱北還還

用四月十三日塋所居鄉張寺里先塋之次其配汝南郡夫人王氏戒其子宗衰經泣拜請銘昔予漫仕與公同朝及考鄉進士試上京公爲畱守判官迨今西遊而公持漕節于吳每見益歡辱與之遊蓋餘二十年銘非予誰宜爲公諱仲字信父衛之汲縣人曾祖諱祚金忠勇校尉步軍將官祖諱泉以公貴贈亞中大夫衛輝路總管輕車都尉追封汝南郡侯父諱麟累贈嘉議大夫禮部尚書上輕車都尉追封汝南郡侯公少警敏稍壯得推擇爲山南淮西二道廉訪書吏貢補吏部令史由樞密院掾爲中書左司掾考成權兵部主事建德路總管府推官崇祥院都事工部主事中書省檢校官進工部員外郎稍遷上都畱

守司判官兼本路都總管府判官兼推官出爲河南江北等處行中書省理問官揚州路總管改漕運萬戶廕十官皆不俟終更而惟建德推官未嘗上階自承務郎七遷而至太中大夫食正三品祿終其身公以文吏自奮於刀筆間挾通敏之資而達之於用應事制變它人首鼠不決公徐出片言裁其過甚而弥縫其缺失無不動合樞機揚州之政不隨不激人尤樂稱道之與人友悃悞無華久而彌親故其死聞者盡傷得年七十元配王氏先卒封汝南郡夫人男宗後配王夫人出也女長適王某次適郭某次未行銘曰粵有才焉際可而仕不屈於時亦敏於試爵爲通侯

可謂既貴未及縣車終於其位歸從先人丘首之義
陵谷有遷吾銘斯臚

無爲子碣銘

無爲子少時遊方之內應物而不滯於物人謂其一
代豪俊人也中歲去而遊方之外葆真而全其真形
化而神不化雖列仙山澤之臞要不是過何其異哉
無爲子故儒家姓張氏諱悌字信甫居鄆之蒙山有
別業在鄆城扁舟往來傲兀煙浪自視如鷓夷子皮
然好結賓客重交遊肴觴左右具捐所有予人無吝
色父嘗以戶門微罪當逮詣吏無爲子奮前請繫曰
父老願以身代雖萬罪不敢辭父藉以免奉親能備
孝養而身與妻子衣簾食糲而已蒙山中大瀛海陶

隱居司馬鍊師之遺跡往往而在無爲子早從方士
習聞道家長生久視之說心竊識之既壯出遊南粵
北燕回薄萬里獨愛武當神明之奧巖巒巒峭森溪谷
靚窈鍊形服氣莫此爲宜歸對妻子常語及之而妻
子固不信也一日大會親戚故舊曰吾當去隱武當
矣親戚故舊爭勸心之佯應曰諾詰旦引刀截髮解
故衣被布衲偪屨著行滕佩鉢囊掉臂出門徑去碩
語其家子古初尔善事尔毋教育諸弟尔無以我繫
其心也行涉重江至武當山依止紫霄宮師事其官
主張真人願執弟子役真人亮其確誠啓之道要授
職首衆無爲子晝則服勞薪水間與衆同告甘滋味
取其至薄者夜則危坐一榻脇不至席如是三年忽

晨起別衆衆方恠之則既化矣泰定四年四月二十日也得年四十八化三日道衆瘞之紫霄峰下訃至家家人服喪如禮古初重違先志不敢迎其匭婦因不茹葷血必期至山中樹碣以表其歲乃絕海來吳泣拜請辭昔子客鄞識無爲子衆人中知其健敏可託以事而不知其能離智絕俗究竟生死偉特若是豈出世間法亦必世之勇者而後能決致之歟無爲子始娶許氏子男四曰古初曰謙曰弘曰惠女三其二已有歸其一夭銘曰

劉彥明墓誌銘并序

彥明諱德智字彥明姓劉氏世家于歙曾祖諱元佐祖諱儒望父諱震皆隱德不仕鄉里稱善人焉初彥明之父以張爲後於劉生彥明四歲卒而張氏父固在實爲之經紀家事教育彥明至於成人張五子其一夭而其家素裕彥明尤大父所深愛將使還後夭者彥明泣對曰劉氏無子故以吾父後今既歿于劉氏明其爲劉矣德智以一身繫劉氏之宗誠不敢重獲罪於吾父與劉氏也大父感其言而心彥明少知自厲於學好讀孫吳兵法荀寃釋老方伎之書嘗曰是感疾已乃大悟求之四書浩有所得久而下筆爲文覺其來源源纏纏遂得由庠序選爲建德路儒學正會教授闕進攝其事守郡者諷使文致直學之罪

彥明不爲動侯問覆爲辨說考滿入教授銓翰林院方簾爲其屬而彥明翻然歸矣尋授永順等處軍民安撫司儒學教授未上中書刑部辟爲其部令史官有齎怒於同列而將黜之彥明日無厭將及我投筆謝去於是都水監復羅而致之稍進壽福院像壽福出納五臺諸寺錢糧其田入隸浙西數郡比歲浙西被水有司按實當檢放而院猶責償未已彥明適從其判官出行江南視其牘歎曰官民糧已罷徵吾院田能獨無傷乎悉命施之諸使怒其專擅而卒亦無能奪其議者嘉興有豪民誣占寺田三百畝左證甚明而院所遣使速賂莫能決及彥明來請鬻路絕乃卒歸其田考成得將仕佐郎衢州路常山縣主簿滿

歲江西省有知其爲者辟爲掾新執政至杖一掾而掾實無罪彥明竟歸曰吾唯不能隨俗俯仰以至于是可再辱耶進將仕郎爲平江路總管府知事平江劇部案牘叢脞彥明處之以無倦取其犯名義者一二事稍釐正之不激於奇不毀於隨暇則却騎入閭巷訪求耆舊瑗茗縱談猶書生故態也閱再歲卒官下得年五十五天曆二年七月十四日也談者例警儒生爲政迂闊於事情而不知聖人之法制具於經儒能據經議法故達權而知變彼隨時重輕觀勢何背以竊取通人之名者豈所謂政哉彥明得於所學歷試內外階是以無失身敗名則亦未爲無所見於世也彥明之配李氏姑女先卒子男二燁煜女二長

適徐梅次在室卜地得建德之淳安縣開化鄉駝馬原距家餘百里將以某年某月某日窆先事其子煜具書世出壽年爲狀分京兆杜原父乞予銘其言曰葬而不得銘猶無葬也予嘗識彥明京師知其爲人而杜君又不輕於許予是可銘已彥明始字千里謂其取義之未廣也易以今字脫又號知非子其詩文曰紫溪集鄉先生方公回爲序而藏之于家家有仁本堂鄉相程公元鳳爲大書揭之而陵陽羊公嘯記之彥明之祖程公塲也所謂仁本者彥明固服而行之矣銘曰

守經爲分制變爲通通故能介承之自躬彥明本仁由學以充及試於事事爲之中考其成績粵有始終天不昇年歸于堂封有德有言遺後者豐尚百千年安此幽宮

于思容墓誌銘

邗爲姬姓之國後迺去邑而氏漢廷尉定國族望東海子孫或即居或稍徙支縣庶衍尚爲威德之世朝列大夫益都般陽等處田賦摠管于君思容之先亦自東海徙文登譜足徵也初金季李全據山東以叛其弟二太尉略地至文登君之祖諱祥隱里中方坐塾教諸生兵暴入爲所掠見其儀狀偉岸挾丹臨之偪與俱行至益都稍即問計則亂以他語答之若闔於事機者然當其濫殺亦強諫止之所全活甚多全受擒其妻楊舉衆歸

朝開行省山東因得署爲其從事未久棄去娶臨朐蘇氏而家臨朐生君之父諱世傑讀書知學性高潔不與俗溷中年自放於酒聞宗平浩然南遊擊節自擔曰自晉失其御衣冠播遷中華禮樂萃于南土予將觀善於是而且以淑吾之子孫焉因僑家吳中三十年年七十四無疾卒是生思容思容諱欽少學於吳持其苦力自進弗懈宿儒老生皆折節與交集賢大學士郭公貫浙省平章高公昉尤深知之方以才辟爲淮西廉訪使者書吏未數月而國子助教之命下矣洊擢山東廉訪司照磨在官三年再以國子助教起君會君服母喪喪除以爲翰林國史院編脩官辟御史臺掾進御史臺照磨官拜南臺御史未行詹

事院奏爲其院長史就拜監察御史遷中書左司都事又遷詹事院經歷中書左司員外郎御史臺都事太禧院奏除其屬壽福提管府同知中書省復以爲兵部侍郎方出試田賦府到官未踰月卒官下得年五十至順四年七月十又八日卒之日也君器資宏達而文法敏明官山東時屬歲大饑嘗行縣至濱棣濱棣傍海民尤艱窘君爲之發廩勸分計口以餉之禁防周密民實受惠而免於死徙泰定初元姦黨未盡誅君爲書數百言極陳逆順從違之故請早正其罪所繫者皆顯臣要官間者爲之縮頭在左司叅決機務在臺端振肅風紀辟皆據經守律不務刻深而忌者往往因其銳進構爲誣語以讒沮之其出爲提

管也亦藉是進秩之名而陰以抑退之耳雖不幸遂至大故然使人有不盡用之嗟則君未爲無所見於時而死也昔君之父死吳中策其匱于吳自曾祖妣祖妣及其母高氏六喪皆在淺土君解山東照磨持毋喪時始卜地于益都城南十里望城阜之原而序葬焉今君之子將奉君祔其兆次迺爲書具其世出歷官行治請其識諸其幽某嘗辱與君友其再爲助教某實薦起之洎某補外而君始顯用未及十年已有幽明之間銘固不可以不之予也君之父以君貴贈至中順大夫禮部侍郎上騎都尉追封河內郡伯妣高氏周氏並封河內郡君而君周氏出也君娶金氏亦封河內郡君子男二曰潛曰溥女三其二已行

其一尚勞君官京師嘗題其齋曰壘空而記之其所自得可知已銘曰
學焉而仕行其所知我安以徐彼競於馳方其欲翕有或張之謂天匪私亦毀于隨貴而不年則將尤誰有子承家貽尔慶基不朽者存塚此銘詩

元故武略將軍鄧州新軍萬戶府管軍下千戶贈武義將軍飛騎尉追封靜安縣男靳公墓碑銘并序

自靳氏得姓而其事略見於楚漢之策書至近世升名宦牒始斑斑有人而楚產固無聞焉何其土風之特異也武略將軍鄧州新軍萬戶府管軍下千戶贈武義將軍飛騎尉追封靜安縣男靳公世家河內其

父轉徙兵間行次真定之深州靜安縣縣人劉氏妻以息女遂依之以居生子男七長郎公壬辰歲河南北始伍民爲軍而劉氏在籍中公以弥甥當行隸史都督麾下屯樊城攻襄陽渡漢沔實能以材勇自効阿木元帥見而竒之拔爲帳前至元三年從破劉義受賞統鈔五十貫五年領衆脩白河因與萬戶燕只吉歹蕩平大洪山黃仙洞諸險隘計功班賞有差九年下樊襄公以先登再被釀賞及破沙洋新城進受省撤爲管軍百戶十二年二月追敗宋殿帥孫庠目奪其所乘舟丞相伯顏忠武王壯之手取白金百兩寶刀一具以賜十一月常州城破錄其功真授管軍百戶階忠顯校尉十三年三月江南平丞相奏凱還

朝公從入覲例錫龍衣鞍轡又賜統鈔五百貫丞相若曰靳某爵不酬功吾將有以厚之其署管軍千戶兼西峽渡提舉四月命下得佩銀符進階承信校尉時越閩山區海聚間民相挺爲亂謀報交午行省每有調度必命公以全帥備左右拒若沙縣之廖平章漳州之陳吊眼建寧之黃華皆其講張桀黠者也公出其伐叛招携之謀動必制勝其入建寧手刺渠師黃朝奉王振都而生獲其將陳統制獻之行省又降其大校黃叅謀劉發陳士良等數十人省臣方欽至舉白金碗二柱勞烈就命撫安羅源寧德長溪諸縣爲之署官置吏民得樂生興事如初至是朝命始用丞相之薦授公武略將軍鄧州翼管軍下

千戶重功次也廿一年復從忙古台右丞入朝右丞
為言功狀上嘉賞不置賚以罷衣弓矢鞍轡旦重錫
金符就升管軍中千戶未上樞密院申定兵制復改
下千戶九年公年六十四請于萬戶府曰昔吾早從
征討行冒矢石身被瘡瘍壯強罷虛羸老成痼頽得
放歸田里以終莫齒而令男檜繼職禦戎府上其事
報下如章公即日駕輕車北歸倘徉雞豚杜酒間甫
閱四歲遂卒時則某年某月某日也得壽若干葬某
縣其原祔以其配某氏公軀幹碩力能挽強命中
奮身戎行積勲受爵而尤為伯顏忠武王阿木武宣
王所知平居輕財重義禮賢下士恂恂固儒者也初
越閩之叛諸軍爭致生口公得男女老弱搃若干人

會中秋家宴公厚飲食之且戒曰尔不幸麗於叛黨
今首惡服誅亦良民耳誠能召其所親來吾將悉縱
遣尔已乃間有來者因令自相保任散還鄉里明年
及期所縱男女扶携來謝且大作齋祠祈以福報有
陳生某嘗業儒亦在俘中公亟命之冠帶使教二子
以學又為請諸當路官之庠校間世言武將出世慄
銳乘時致功業犯道家所忌而不知以仁勝不仁固
若時雨之澤物而非以為物之厲也盖觀于靳氏之
世而可信矣公諱忠其父諱用則始家靜安者也初
室張氏生檜忠顯校尉鄧州新軍萬戶府下千戶女
適張某繼室余氏生汝舟奉訓大夫江浙等處行中
書省檢校官汝霖早世女適王克茂孫男二贊今龍

為千戶鎮守黃蘄贊方從學孫女一適李某泰定初有

詔推恩内外文武臣工用其爵秩追榮考妣至于三世乃贈公武義將軍鄧州新軍萬戶府管軍下千戶飛騎尉追封靜安縣男張氏余氏並封靜安縣君汝舟強學敏用詳於議法方為時所不舍是能大其門者比歲官杭某嘗與之遊焉碩謂某曰吾父起行伍有官勲而質直無華嗜善好義施及于我子孫尚竊祿食以不墜其宗使無文字鑿之隧石以昭德訓嗣其謂斯何敢再拜請辭某曰孝子仁人之志某其可重遣之迺據其事狀序次如右又繫之銘銘曰
在至元初元運勃興輯其武功四方次平大將小校

各揚其英發必有中敵來無勅若時雨降庶物憑生
劉甥靳氏擐甲從死自拔行間以善戰名賈勇濟漢
先登蹴荆計功受賞百金為輕雖長千夫寵祿未羸
曰吾忠哉惟所指令山疆海屬汝于大刑首惡既戮
庶孽為清夷凶獲醜載世承寧吾老有子願服踐更
庶幾畢景仰首皇明公今已矣墓栢青青介子村良
列官外廷爵以疇庸猶序而升紫綬金魚卹典宜膺
漏泉之澤赤矣明靈本武經文沒有餘榮有子而令
卒大其成聞左徵兵丁壯于行河朔之間塵無遺岷
彼薦草 莽叢冠纓公在師中惟其血誠老氏若曰
累善如登尔子尔孫世篤忠貞文于冢石以鴻厥聲

馬仲珍墓誌銘并序

睦州詩在唐中季有章協律方處士季逮州在宋渡江後有高師魯滕元秀皆清峻簡遠各自名家仲瑜嚴其芳華汰其膏潤問詩法於耆老成人盡得肯綮措意遺辭初猶稍尚葩澤晚更脫略邊幅直窺微妙徃徃年自為卷而製名述序要有深意統曰歲遷凡四十卷溢之為銘贊記序雜古賦又十有二卷亦各自名編蓋其學本之經驗之人事而槩發之於言故能致多如是然反而求之見其約不見其博嗚呼仲瑜死矣詩當得傳如前數公無疑爵位功業孰久孰近何足計哉仲瑜姓馬氏諱瑩其字仲瑜世家建德縣之新亭鄉族故大也乾道淳熙間有與徽文公仕學相上下官至禮部尚書諱大同者於仲瑜為七世

叔祖矣曾祖諱治鳳祖諱之友父諱維桂皆畜德不試毋濮氏亦里中望宗仲瑜少而穎發長益潛深精研經史旁連諸子百家下逮山經地志謠俗方言朝披夕攬舉華躋英中雖醲郁而外實夷澹鄉鄰子弟來學徃教就其矩度莫不卓見端緒一時名人勝士景向聲求郵詩願交爭取力挽延祐科興議者品量人材咸謂仲瑜有以自効而有司苟知仲瑜亦咸望其出奇一勝以售其明始用春秋舉上不利後更用禮記亦不利人意仲瑜怠矣方益厲氣賈勇為其文不少輟久之彙次所著五經大義四書荅疑及自問自荅策合若干篇題曰困天集而其志孤矣仲瑜嘗倣漢魏樂府辭唐柳柳州新體制

皇元饒歌鼓吹曲十有二章將橐之走京師異塵
乙夜之覽而未及脫藁又嘗手選唐五百家詩五卷
宋南渡諸家詩一卷別有講義讀書記各二卷藏于
家其學橫鶩捷出如車適御矢破的也仲珍娶翁氏
生子男二曰鈞曰鉉孫男一仲珍病時始生命名其
瀚仲珍生至元庚辰卒元統甲戌得年五十五閑居
善自脩飾或佳客時至情景俱勝促觴命酌取琴鼓
一舟行自吹洞簫倚歌和之一毫不以貧窶累其心
自署號雪夢居士天趣自得可涯矣哉元統元年子
客吳下臘將盡仲珍扁舟歛門語夜叅半請曰夫子
知我文莫為有司為則有以振我度歲別歸神色揚
揚子方張之期其晚達是冬子東還次睦則聞仲珍

十一月十五日以疾卒家先一日力疾語子鈞曰我
死必求柳先生銘不得銘則無以葬鈞既卜藏城馮
塢祖塋之次惟食將以明年某月某甲子空廼具行
治為狀衰經踵吾廬泣拜道遺命請辭嗚呼予尚忍
不銘吾友也耶銘曰

孰昌其詩不售于藝亦蓄其年而卒殄瘁得深行遠
要以永世我銘斯阡質之無媿

元故奉政大夫僉嶺北湖南道肅政廉訪司

事崔公墓碑銘并序

從仕郎河南江北等處行中書省理問所知事崔敏
數千里貽書諭貫曰敏之大墓在神山自曾祖仕衛
再世葬胙城胙城濱古河道河雖別流而漂砂擁礫

冒沒人廬舍冢墓勢如潮汐不可遏止比歲先人卒官湖南還卜兆域得大梁開封墻堡里小邊村維食因奉遷二祖之靈而以先人序葬其次今十又七年矣隧間之石未有刻辭惟先人之友獨先生在先生嘗司諫于奉常其言信能昭德表行敢具列官世行治壽年卒葬終始為狀而以銘累先生貫應曰而父雅知予文銘予臧也迺序而銘焉序曰崔氏出姜姓齊丁公伋之子食采於崔遂曰以民世遠宗滋偁居占徙代序莫詳金正大間有諱世英者始自惠州神山縣以軍帥從戰北口蹈難死弟諱德茂襲其職會天兵南下遂以全師効順得授左副元帥領所部鎮神山後以城變遇害元帥之子諱義隸史開府幕下

有善文法聲累遷輝州安撫使兼屯田提領即居胙城以葬者也湖南公諱良承字欽少靜密有為讀書知大義薄遊錢塘以材諳自致江淮行省署為理問所令史進浙東宣慰司令史上官善其幹敏每出專征伐行幹財計必擇公以從公亦樂為之翰誠贊理考滿授將仕佐郎兩浙都轉運鹽使司知事尋辟江浙行省掾稍遷從仕郎袁州路分宜縣丞未上辟宮師府掾超受承事郎江浙省理問所知事時執政方病二浙監法之弊而莫究其窳卻迺出公循行諸場推見隱訛而因以時施置之法既不煩賦亦易羸治辨而還衆益才之既代選補中書左曹掾明年擢戶部主事階承直郎勾校簿書綜覈出入勞績弥顯

又明年陞奉訓大夫中書左司都事遷奉議大夫宗
正府左右司郎中御史臺復奏以為監察御史出按
事山東未還遷授奉政大夫僉嶺北湖南道肅政廉
訪司事在官七閱月分按衡全永寶慶武岡五路涖
治精嚴訊獄詳允雖受劾被黜罰而人不以為苛道
病還卒潭州治所至治元年六月十又六日也得年
六十一娶王氏特封胙城縣君子一敏也嘗以國子
生從貫學治經介然有立女二長適中順大夫漢陽
知府兼管內勸農事盧恂次適承事郎太常禮儀院
郊祀署丞續欽祖孫男四性學志學禮學嗣學孫女
一未行葬以卒之明年春三月某甲子曾祖左副元
帥府君祖安撫府君父諱慶河南河北等處絲銀人

匠提領始又從大梁為大梁人以公貴贈奉訓大夫
禮部郎中飛騎尉胙城縣男母蕭夫人追封胙城縣
君邊村之瑩安撫居北之中禮部居左皆以其配祔
公平居恂恂安言徐視未嘗以氣加人而其中所自
信剛果亮直不為回撓故於吏治能執常御變機張
鍵閑於情無不盡而於法無所損益五辟掾六遷官
皆典章法令之收司識其統體持其綱要於薄物細
故豁如也方出節觀風奄至大故識者惜不盡用而
為世道人才計者至今猶有憾焉公自戶部左司暨
登六察與貫並居京師遊好最稔而知公制行之詳
以能載之於銘亦莫宜於貫貫茲銘公是以無讓銘
曰

繫齊庶姓有食于崔別氏承宗燕及雲來基德之厚
若種而培維忠維孝則罔後裔自公始奮名允藝而
木則有松馬則有駉揚中踐外其立不回憲物容典
式時討裁烝烝成乂暨暨達財天固予之又軋而摧
其摧曷以不至耆名翼子貽孫既條既枚非承孰引
非用無恢墻堡之虛雙表崔嵬瑒此銘詩尚有徵哉
故宋宣教郎主管禮兵部架閣文字林公墓
碑銘并序

諸姬之庶姓有以字為林氏者子孫世仕于魯之季
氏而放為孔門弟子元和姓纂調比干有子迺之長
林遂以繫氏夾滌通志辨其非矣自周而降歷千有
餘年族散宗遷邈不可考而南粵東甌相繼特起以

科目宦學相高洽于季宋東甌尤盛雖同州黨然各
自為譜緒系不明蓋非一日之積也東甌別譜有君
於求嘉華蓋鄉黃石山下者自宋武經大夫知柳州
軍州事諱瀆孫始顯而公其嗣子擢景定壬戌丙科
賜同進士出身調常州司戶參軍再調福州觀察推
官未上廣西經畧安撫使辟為梧州軍事判官留佐
幕府尋除主管禮兵部架閣文字用薦改京秩階宣
教郎遷樞密院編修官以養親辭不拜方遭內艱而
宗既改物遂得高蹈遠引全其不仕之節而著其歸
潔之義天固厚幸之矣公諱璿字壽玉一字尉玉曾
祖諱師正宋將仕郎祖諱武受業紫陽文公之門人
服膺中庸尚絅之訓以碩儒望里中用特科入官滿

河池尉退而講學于家卒以柳州恩贈朝散郎父柳州治孫吳尉繚子司馬法登武舉進士第由普州徙柳州其家始因之以大者也公初任常州州庾儲粟餘萬斛歲久將腐公白郡請新陳均給粟得不耗守服其能嘗受檄慮囚囚有具獄當其衆死者吏挹成案前請公占署公閱積疑未究一問得其誣服之情平反上之囚以不死又嘗攝宜興無錫二邑皆先教後禁治之以靜其最知公而薦之於朝者魏公克思趙公與植孫公嘉趙公與積常公樹陳公昉林公洽陳公懋欽也凡是數公皆名卿賢大夫其所稱可非苟然者始孫公將持薦公公詳以資淺宜先元僚孫公義之立為改奏而次亦遂及於公時公纔三十餘

使其老智慮於更嘗寃
於克闡其至誣可量
哉公自少抱負不碌碌要
試於時中 惟艱棘歛
其鋒鏑益磨礪淬厲於孝
卒就平實其居鄉處
族媼有惠利可以及人雖
弗顧也季弟繼諸葛
氏無子死公割已產釋於
黨立後承宗奉內外族
貧不能奉之喪無一毫係
此吾孔氏家法也端
居二十年寄情吟咏自號
峯散人元貞丙申得年
五十八以其春三月十日
散疾命奉扶起坐正冠
襟而卒此豈無得者哉公
諸葛氏先卒子男二長
曰堅天次曰堂女一適將
郎曾怡老孫男二鈺錫
曾孫男二淮浩自初喪策履于建牙鄉郭溪黃岡柳
州墓下今卜得藁吉將迁窆于膺符鄉信壘之原於

是堂為慶州路儒李教授以其友鄉貢進士章仕堯所次事狀千里具書致幣請銘其窶而予友温台等處海運千戶趙君大納比宰永嘉常以事過公里下瞻喬木之陰歎人門之美談次每為予言之固已悉夫林氏之世矣尚何諛墓之嫌哉嗟乎薄社為墟而郤鼎致賂吾不為殷臣之逋播而為殷士之裸將不為澤畔之憔悴而為遠游之娛戲公之素志蓋不然也然而所積者厚所養者深谷駒自禁而纁帛弗加因得以葆勝舍之潔遂元亮之高沒餘二紀而子孫之敷蓄益敏詩書之鍾艾愈豐銘以昭德不鄙厲華於予之烏乎辭銘曰

顯允林宗世服于礼公纂其華繩其美方序而兆

胡遜於肥鳳縹鷁退繫乎其時藝仁人熟艱則致裕未耆而嗟何奪之遽歿殷百年壽苟无遺祭于社主過者垂涕膺符之鄉啓茲封域有鏤銘章用訓無斃

元故戴孺人刘氏墓銘并序

里中戴暄景和之内子刘氏越諸暨人生二十一年婦暄婦三十八年相暄治生理家事舅姑字兒穉和宗黨甚得婦道以至元四年其歲戊寅秋七月三日卒家年五十九卒後三月卜葬金竹塢其日九月癸酉也刘氏諱錦父曰天麒母曰王子男三垚良元女一適趙仁本孫男三恭温安女一俱幼比歲良以父命來從李于治經今年春月泉書院任為直李試肅政府婦而母病聘醫致禱無所不至閱四月遂以不

起於是暄失良配哀不勝情將葬復遣良哀經款門
乞辭鑽石乃為之辭曰
婦則毋儀觀于而家方豔而悴有戚其嗟維以昭之
銘則非夸

柳待制文集卷之十一

